

**Sinerissap qanittuani aalisariutit isaterneqarneranni
akileraaruteqaataajunnaarnissaannik Naalakkersuisut peqquneqarnissaannik
Inatsisartut aalajangiiffigisassaattut siunnersuut**
(Inatsisartunut ilaasortaq Jens Napātôk', Partii Naleraq)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Siullermeerinnineq

Aallarniutigalugu Inatsisartunut ilaasortaq Jens Napaattoq, Partii Naleraq, aalajangiiffigisassatut siunnersuuteqarneranut Naalakkersuisut sinnerlugit qutsavigaara.

Inatsisartunut ilaasortaq Jens Napaattoq sinerissap qanittuani aalisariutinik isaterisarnerup akileraaruteqaataajunnaarnissaa pillugu Inatsisartut aalajangiiffigisassaattut siunnersuummik saqqummiussaqqarpoq.

Ullumikkut malittarisassat atuuttut malillugit isaterinermut tapiissutit inuussutissarsiummik ingerlataqartup pissarsiarisartagai piginnikkunnaarnermi pissarsiatut isigineqarput. Isaterinermi tapiissutit aalisartup angallammik ukiumoortumik nalikilliliinerata kingorna akileraarutitigut naliusumit qaffasinneruppata iluanaarutit akileraaruserneqassapput. Tapiissutit ikinneruppata amigartoorutigineqartut ilanngaatigineqassapput.

Aammattaaq inuussutissarsiummik ingerlataqartup aalisariutip pisoqalilluni atorunnaarneqartup isaterneqarneranut eqqagassalerinermullu atatillugu aningaasartuutini isertitami akileraarutaasussaasut nalunaarsornerini ilanngaatigisinnaavai.

Ataatsimut isigalugu pisortanit tapiissutit tapersiissutilluunniit aalajangersimasut akileraarutaasussaasanniginnerusut akileraarutaassanersulluunniit pillugu oqallittoqartillugu tamatumunnga taarsiullugu tapiissutit annertusineqarnissaat pitsaanerussannginnerusut pissusissamisunnginnerussanersorluunniit isumaliutigilluarneqartariaqarpoq.

Tamanna siunnersuuteqarnikkut aamma kissaatigineqarsorinarpoq, tassa inuussutissarsiutigalugu aalisartut aningaasaqarnikkut pitsaanerusumik atugassaqartinneqarnissaannik qulakkeerinninnissaq ilaatigut anguniarneqarmat, taamaalillutik aalisariutinut nutaanut aningaasaliisinnaaqqullugit. Anguniakkat taamaattut tapiissutit amerlineqarnerisigut toqqaannarnerusumik pisarinnerusumillu anguneqarsinnaapput.

Naak anguniakkanut taamaattunut Naalakkersuisut ilaatigut isumaqataasinnaagaluartut taama iliuuseqarnissaq pillugu oqallinnerit aningaasanut inatsisissaq pillugu isumaqatigiinniarnissanut imaluunniit Aalisarnermut aningaasaliissutinut immikkoortitat pillugit inatsisip oqallisigineqarneranut atatillugu ingerlatissallugit tulluarnepaassagaluarpoq.

Tassunga atatillugu iliuusissap aningaasalersorneqarnissaa ilanngullugu aamma oqallissutaasinnaavoq. Nunatta Karsiata iluanaarutaanut appariaataasumik iliuusissamut aningaasartuuteqartoqassasoq siunnersuuteqartup oqaatigaa, taakkuli qanoq aningaasalersorneqarnissaannut siunnersuuteqarnani.

Tassunga aamma atatillugu isumaliutigineqarsinnaavoq tapiissutit pisuni tamani qaffasinnerusinnaanersut imaluunniit qaffaasoqassappat tamanna siunertanut aalajangersimasunut atuutsinneqassanersoq isumaliutigineqarsinnaavoq. Aammattaaq avatangiisit eqqarsaatigalugit aalisariutinik pisoqalisunik avatangiisinut mianerinnilluta igitsisarnissarput, aalisartut akornanni pisariaqartitat aammalu inuussutissarsiummik ingerlataqartut aningaasaqarnikkut nalinginnaasumik atugaat isaterinermit tapiissutit pillugit oqallinnermi ilanngullugit oqallisigineqarnissaat tulluartsuussaaq.

Isaterinermit tapiissutit akileraarutitaat siunnersuummisut kisimik aalluteqqinniarneqarpata akileraartarneq pillugu naalakkersuinikkut isumaliutigineqartut ilaatinneqarnissaat pingaaruteqassaaq.

Matumani pingaartumik siunnersuut akileraartarnermi periutsip aqqissuunneqarnera malillugu inuiaqatigiinni annertuumik naleqartitatta pisariitsup ataqatigiittullu attatiinnarnissaanut ilapittuutaassanersoq isiginiassallugu naleqquttuussaaq. Akileraartarnermi periutsip ataqatigiittup ilaatigut nassataraa pissutsit assigiit akileraartarnikkut assigiimmik pineqartarmata.

Isertitat akileraarutaasussaasut nalunaarsorneranni aalisariutinut nalikilliliissutit aammalu inuussutissarsiummik ingerlatsinermit atatillugu aningaasartuutit ilanngaatisinnaanerit inuussutissarsiummik ingerlataqartut iluaqutigisarpaat. Aammattaaq oqaatigineqareersutut aalisariutinik isaterinermit eqqagassalerinermullu aningaasartuutit inuussutissarsiummik ingerlataqartunut aallaaviatigut ilanngaataasussaasutut aningaasartuutaapput.

Taamatutaaq inuussutissarsiummik ingerlatamit isertitat inuussutissarsiummik ingerlataqartup isertitaatut akileraarutaasussaataapput. Taamaalillunilu isertitat aningaasartuutillu akileraarutitigut qanoq iliuuseqarfigineqartarnerat pitsaasumik ataqatigiissuseqarpoq.

Isaterinermit tapiissutit inuussutissarsiummik ingerlataqartup pissarsiarisartagai aalisariummik piginnikkunnaarnermi isaterinermullu atatillugu isertitanut aningaasartuutinullu allanut sanilliullugu siunnersuut malillugu allaanerusumik suliarineqartassapput. Aalisariummik iluanaaruteqarluni tunisineq isertitatut akileraarutaasussaassaaq, isaterinermullu tapiissutit isertitatut akileraarutaasussaassanatik.

Taama assigiinngissuteqarnerat akini aalisariummik pisisup akiligassaani aamma takuneqarsinnaassaaq. Pisisup akiliutigisaa inuussutissarsiummik ingerlataqartumut

akileraarutaasussaalluni isertitaassamat pisisup akileraarutitaqanngitsumik isaterinermut tapiissutit malissagunigit annertunermik akiliuteqassaaq.

Taamaalilluni piginnikkunnaarnermi pissarsiat eqqarsaatigalugit siunnersuut akileraarutitigut assigiinngissitsinermik nassataqassaaq, taamaalillunilu assersuutigalugu aalisariut tuninagu isaterinermut tapiissutisinissaq aningaasaqarnikkut orniginartinneqarnerulissalluni.

Taama assigiinngisitsilersinnaaneq tunngavissaqanngitsutut aammalu inatsisit atuuttut ataqatigiinnginnerulernerannik nassataqassalluni.

Qulaani taaneqartut tunngavigalugit siunnersuut akuerineqassanngitsoq Naalakkersuisut sinnerlugit inassutigaara.